

**■ COLUMNA**

# Nus essan anc adina qua!

DAD ALICE BERTOGG\*

**I**ls dinosaurs èn morts oravant ina massa milliuns onns, sco ch'i para pervia d'in culp da meteorit. Ma èsi propi era stà uschia? Forsa han ils dinos era maglià in l'auter e l'ultim è lura simplamain mort da la fom. Els fissan lura sezs la culpa ch'i na dat betg pli els.

**T**enor l'Unesco pudessi esser ch'il rumantsch na surviva betg ils proxims tschient onns. E sch'ins guarda la situaziun actuala èsi schon bunamain ina miracla che nossa lingua ha survivì il coronavirus.

**M**algrà ch'il coronavirus ha mazzà ed infectà millis e millis da persunas datti anc adina nus! En Svizra èn s'infectadas passa 30 000 persunas cun questa malsogna maligna, quai fissan radund la mesadad da tuttas Rumantschas e tut ils Rumantschs. E plitost baud che tard fissan er ils auters 50% daventads unfrendas da la pandemia. Ma na, nus essan anc qua!

**L**'Uffizi federal da sanadad publica ha percurschì nossa deblezza e n'ha perquai era gnanc fatg la bregia da translatar ils placats da proteziun en rumantsch. Ma «tuppamain» èn las Rumantschas ed ils Rumantschs sa dustads ed uschia hai lura tuttina dà



cumonds e scumonds per rumantsch.

**I**l mument appelleschan tut las destinaziuns turisticas svizas da far vacanzas en l'agen pajais. A mai pari ch'il Grischun clomia il plidat aut – e quai per ordinar per tudestg. Cler! Ins vuless gea carmalar ils «Unterländer» en nossas bellas valladas e sin noss culms particulars. Ma culms e vals datti er en il Vallais u en il chantun Berna u Lucerna. Nus avain dentant insatge unic – nus essan unics! Quai savain nus sin il plitard dapi che Pascal Gamboni ha fatg in hit ordlonder ils onns 1990. Ma essan nus era superbis d'esser unics? D'avair insatge che mo nus avain? E quai schizunt en pliras variantas? E nossa lingua viva anc! Nus essan anc adina qua, e quai betg mo en il museum. Ins po visitar nossas vischnancas e baterlar cun nus, cler era per tudestg – ma nus essan Rumantschas e Rumantschs.

**A**ls giasts n'èsi da far naginas reproschas. Co duain quels era pomai savoir ch'els han surpassà il cunfin rumantsch sch'els vegnan anc adina salidads cun in «Grüezi» u cun in grond placat da «Herzlich willkommen»? Sch'els locals indigens han «offen» u magari era «Ruhetag». La negligentscha da nossa lingua materna u paterna cumenza a la tgina dal Rain cun la tavla «Rheinquelle». Ed ella na para d'avair nagina fin, pertge che dapertut en terra rumantscha chatt'ins las passidas tudestgas, gea perfin englaisas. E quai n'è betg mo la culpa dals responsabels dal turissem. Mintgina e mintgin che sa rumantsch, sa bain dapli?

**R**umantschas e Rumantschs – as svegliai or dal dischariel da corona! Nus essan anc adina qua! Forsa – na, speranza – pli frestgs e persvadents ch'avant. Lain nizzegiar la schanza e dar nov fieù, nov anim a nossa singularitad. Per che betg mo il Lag la Cauma u il Lai da Palpuogna sa derasian sin Instagram per il mund enturn, mabain era l'enconuschientscha e l'experiencescha cun il rumantsch. Nus essan anc adina qua!

\* Alice Bertogg da Sevgein è promotura regiunala da la Lia Rumantscha en Surselva. Las columnas per la FMR scriva ella ord vista privata.